

Dumonda Fasani-Horath concernent la valitaziun da l'obligatori da vaccinar resguardond las malsegirezzas en connex cun la vaccinaziun

En la Lescha federala d'epidemias (LEp) stat en l'art. 22: Ils chantuns pon declerar per obligatoricas vaccinaziuns da gruppas da la populaziun periclitadas, da persunas spezialmain expostas e da persunas ch'exequeschjan tschertas activitads, sch'igl exista in privel considerabel.

Il minister da sanadad Alain Berset po s'imaginar ch'i pudess daventar obligatoric per tschertas persunas da laschar sa vaccinar cunter COVID-19. En la «Rundschau» SRF dals 23-09-2020 ha el numnà p.ex. il persunal da chasas da persunas attempadas che dastga lavurar vinavant cun persunas pli veglias mo, sch'el è vaccinà cunter il coronavirus – uschespert ch'ina vaccinaziun è disponibla ed admissa. Durant quest temp stuessan persunas che na vulan betg laschar sa vaccinar, laschar sa dischlocar en in'autra partiziun, nua ch'i na sa chattan naginas persunas da ristga, perquai che tenor lescha na dastga nagin vegnir sfurzà fisicamain da laschar sa vaccinar.

Suenter l'inoltraziun da la dumonda per l'admissiun d'urgenza da la BioNTech/Pfizer ha dr. med. Wolfgang Wodarg (medi da pulmuns ed anteriur medi uffizial, anteriur deputà da la Cumissiun da sanadad dal parlament da la Republica Federala Tudestga) inoltrà il 1. da december 2020, avant bundant 1 emna, ensemen cun l'anteriur manader da perscrutaziun da Pfizer, dr. Michael Yeadon, ina petiziun a la European Medicine Agency (https://2020news.de/wp-content/uploads/2020/12/Wodarg_Yeadon_EMA_Petition_Pfizer_Trial_FINAL_01DEC2020_EN_unsigned_with_Exhibits.pdf).

Interessant è quai perquai ch'il Cussegl naziunal ha acceptà la fatschenta «admissiun simplifitgada da medicaments e da vaccins» en la sessiun da settember 2020 e perquai che l'Uffizi federal da sanadad publica (UFSP) vuless cumprar vaccinaziuns cun differentas tecnologias (mRNA, basà sin proteins, basà sin vecturs) (<https://www.parlament.ch/de/ratsbetrieb/suche-curia-vista/geschaefte?AffairId=20203453>). En quella èsi fixà che medicaments e vaccins ch'èn admess en in auter pajais, ils quals han in sistem d'admissiun equivalent, possian vegnir admess da Swissmedic en Svizra senza in'ulteriura examinaziun u cun in'examinaziun massivamain simplifitgada.

La petiziun è pia drizzada per uschè dir a la «Swissmedic» da l'Europa, da la quala la decisiun vegn ad esser decisiva er per nosssa Swissmedic. Per proteger la vita e la sanadad da las probandas e dals probands vegni pretendi dals iniziants da la petiziun ch'ils studis davart il vaccin vegnian interruts immediatamain e cuntinuads pir, cur ch'in concept da studi è avant maun, il qual è adattà per tegnair quint da las resalvas da segirezza considerablas (substanzas dal vaccin e concepziun dal studi). Sin basa dals blers differentes tests PCR da fitg differentas qualitads n'èn determinabels cun la tschertezza necessaria ni la ristga da daventar malsau ni in eventual niz da la vaccinaziun. Gia pervia da quai èn tals tests da vaccins vi da l'uman sco tals betg etics. Ultra da quai vegni renvià a studis da pli baud cun ristgas enconuschentas che derivan per part da la natira dals coronavirus.

Las resalvas sa drizzan en quest connex oravant tut als suandants puncts:

- La furmaziun d'uschenumnads «anticorpuls betg neutralisants» po chaschunar spezialmain, cur che probandas e probands vegnan en contact suenter la vaccinaziun cun il dretg, cun il virus «selvadi», ina reacziun dal sistem d'immunitad exagerada. Quest uschenumnà rinforzament dependent dals anticorpuls ADE (antibody-dependent enhancement) è p.ex. enconuscent gia ditg en experiments cun vaccins cunter corona tar giats. En il decurs da quests studis èn morts tut ils giats che han l'emprim cumportà bain la vaccinaziun, suenter ch'els èn vegnids infectads cun il dretg coronavirus. Cun rinforzaders da l'effect vegn questa surreacziun anc sustegnida.
- Da las vaccinaziuns vegni spetgà ch'i vegnian producids anticorpuls cunter proteins spike da SARS-CoV-2. Proteins spike cuntengnan tranter auter er proteins omologs a sincitin ch'èn – tar mammals sco l'uman – ina premissa essenziala per il svilup da la placenta. En mintga cas stoi vegnir exclus ch'in vaccin cunter SARS-CoV-2 activeschia ina reacziun che renda immun cunter sincitin-1. Cas cuntrari pudessan dunnas vaccinas patir d'ina nunfritgaivladad per in temp betg determinabel.
- Ils vaccins mRNA da BioNTech/Pfizer cuntengnan poliethylenglikol (PEG). 70% dals umans sviluppan anticorpuls cunter questa substanza – quai vul dir che blers umans pon sviluppar reacziuns allergicas, eventualmain mortals, sin il vaccin.
- La durada bler memia curta dal studi na permetta betg da valitar realisticamain las consequenzas tardivas. Sco tar ils cas da narcolepsia suenter la vaccinaziun cunter la grippa da portgs pudessan las consequenzas tardivas vegnir observadas en cas d'ina admissiun urgenta pir, cur ch'igl è gia memia tard per milliuns d'umans vaccinads. Regenzas planiseschan d'exponer milliuns d'umans sauns a ristgas betg acceptablas e da sfurzar quels da sa laschar vaccinar prendend restricziuns discriminantas per persunas betg vaccinas.

En vista ad in'eventuala ristga da segirezza dals vaccins vegnints è la dumonda a la Regenza la suandanta:

Co vegn il chantun a sa cumportar en il proxim futur envers persunas betg vaccinadas cunter COVID-19 en vista a la situaziun critica da la produenziun da vaccins ed en vista ad in'eventuala admissiun dals vaccins che vegnan testads actualmain en la procedura da telescop e senza concept da studi segir, e co vegn el a sa cumportar damai ch'i n'èn avant maun nagins resultats da studis da lunga durada, schebain che novas tecnologias vegnan applitgadas e schebain ch'ils producents èn deliberads da la responsabladad:

1. Poi vegnir exclus per persunas che vulan s'opponer a l'obligatori da sa vaccinar tenor l'art. 22 LEp ch'ellas perdian lur piazza da lavur u ch'ellas vegnian dischlocadas?
2. Pudessi esser che persunas betg vaccinadas ston subir restricziuns en la vita da mintgadi (far cumissiuns, transport, cultura)?
3. Tge criteris ston esser ademplids per declerar in privel sco considerabel tenor la LEp?

Tavau, ils 9 da december 2020

Fasani-Horath (Mesocco), Jenny, Weber